

ni'o cai lisri la nichte cadzu

ni'o sai pa mo'o nu penmi

ni'o pa pi pa mo'o nu cadzu

.i .e'u nai cai la nichte cadzu ba mulno spogau lo se terpa da poi fanva dei lo na logji bangu .i mu'i bo lo nu fanva cu rinka lo nu da poi mi'a mipri ke'a lo bradi be mi'a cu tolmipri binxo .i la'a la'e di'u simlu lo ka mutce cizra vau do .i ku'i do ba jimpe .i di'e krasi le lisri

ni'o ni'o la susan cu mutce lerci le nu penmi le mensi be ri .i la susan ze'u na penmi le mensi .i ri'a bo la susan fa'u le mensi cu xabju la kalifornias fa'u la masytcusets .i ku'i ca le cabycte le mensi cu vitke lo tcadu poi sy xabju vau zi'e no'u la san fransiskos zi'e no'u la sanfran .i la susan ca sutra cadzu klama le gusta po le nu penmi

ni'o la susan cu zgana lo cmalu dargu poi jai jdika lo ni cadzu .i ku'i mutce manku gi'e se terpa .i ku'i sy peisku lo glico panra be lu na srana .i lo sluji be fi mi cu xamgu .i mi pu tadni lo nu damba ca lo nu mi citno .i mi ka'e kurji mi li'u .i se ki'u bo nergau le cmalu dargu .i sy gasnu co zenba jdari jgari lo kosta mu'i lo nu le dargu canlu cu lenku gi'e ji'a mutce zmadu lo vi drata dargu canlu lo ka lenku .i sy zgana lo nu la'e di'u cu mutce cizra .i se mu'i bo zenba sutra cadzu

ni'o sy ze'a cadzu .i le dargu canlu cu manku binxo ri'a lo nu so'o tergu'i cu spofu .i ba bo mulno lo ka manku .i sy terpa la'e di'u .i ku'i mutce lerci .i se ki'u bo ti'a le xance sy klama lo manku .i mutce smaji .i sy tirna lo vasxu se bacru be lo gerku be'o .e nai lo drata

.i ba zi bo sy facki lo du'u lo bitmu cufanmo le dargu .i le bitmu cu rufsu .i se ri'a bo sy cortu le xance .i la susan cu so'i roi mabla bacru .i sy carna fi lo te cliva be le bitmu pu'o lo nu sy zgana lo nu lo bitmu cu te gusni lo crane lo grusi

ni'o se pi'o lo bitmu gusni sy ka'e zgana lo se zvati .i lo cmalu gerku po'o cu zvati le fanmo be le dargu .i le gerku cu catlu sy gi'e sligau lo rebra .i za'a le bitmu cu marji lo staku bliku .i ji'a lo ciblu be lo xance be sy cu cpana

.i .ii .u'e sy pencu le bitmu le xance da .i je da krasi lo boxna be le bitmu sefta .i .u'e sai na sance la'e di'u .i ji'a le ciblu poi cpana le bitmu cu se sakcpe le bitmu .i le sefta be le bitmu cu simlu lo ka se boxna gi'e cenba lo ka skari .i sy cu djica lo nu cliva vau mu'i lo nu lerci .i ku'i tu'a le bitmu cu dukse lo ka cinri je cizra je se terpa .i le gerku cu co'a cladu bacru

ni'o spaji fa lo nu lo gusni cu jmaji lo tarmi .i sy ze'a zgana lo tarmi poi ca'o cenba .i ba bo sy sukxa jimpe lo du'u le tarmi cu simsa lo .oxtapodi .i le tarmi cu co'u mulno lo ka frica lo sruri .i ji'a .ii cai pa tu'urbirka cu tcena lo ba'e vacri pe fa'a sy .i so'o tu'urbirka cu ba zi ji'a tcena .i re ri muvdu je jgari le gerku .i lo tu'urbirka cu tagji zenba .i ca'o bo le gerku cu cladu cmoni .i ji'a ri binxo co porpi re spisa .i lo ciblu cu se bumru lo ve'i canlu .i pi so'u ciblu cu binxo co cpana la susan .i la'e di'u rinka lo ka sy kakne lo nu bajra .i sy carna lo te cliva be lo tu'urbirka crida ca lo nu lo tu'urbirka co'a lacpu lo gerku spisa fa'a lo barda ke blabi ja'urxe'a poi nenri lo midju be lo crida

ni'o sy bajra se rai lo ka kakne sutra .i ku'i pensi lo si'o krixaxa .i ba zi bo ji'a sy viska lo zdani claxu remna se pi'o lo bitmu gusni .i ry sipna ni'a lo papri .i sy jgari ry gi'e troci lo nu cikna rinka .i sy krixaxa lo glico panra be lu .ii ko sanli .i ta jersi .i ko bajra li'u .i ku'i za'a ry na jimpe .i sy krici lo nu ry menli tolcertu .i ku'i sy ka'e tirna lo cilmo ke citka sance .i se mu'i bo jgari ry .i rinka lo nu ry sanli .i sy viska lo nu le crida cu mulno cliva le bitmu gi'e klama lo re remna .i se mu'i bo sy lacpu le zdani claxu .i ku'i ri mutce masno .i sy ca'o troci lo nu sidju

ni'o le remna cu farlu .i sy pu'o sidju ca lo nu le crida cu jgari ry .i so'o tu'urbirka cu lacpu ry fa'a le moklu ca'o lo nu lo drata cu lacpu le crida fa'a sy .i ry pu zi co'a krixaxa .i ku'i ry jibni le moklu .i ca bo sy tirna lo smaji batci sance .i ry mulno ke smaji je toljdari ke'e binxo .i sy boi za'u roi bajra gi'e klaku fi ry

ni'o pa pi re mo'o nu badgau

.i mutce manku ri'a lo nu le bitmu pu zi co'u te gusni .i se ni'i bo sy na viska lo remna poi sy janli ke'a .i ku'i sy na jai xrani ri .i ri'a bo ra jgari le birka be sy gi'e kurji to ku'i tcetce sutra toi renro sy lo

loldi .i le nanmu to lo voksa cu ju'o mapti lo nanmu toi cusku lo glico panra be lu ko to'e sanli gi'e to'e muvygau .i la'a lo nu do bajra di'a cu mukti lo nu ti jdice lo du'u do zmadu mi lo ka cinri li'u

ni'o cusku ri poi se terpa gi'e milxe cfipu sy ba'o so'i fasnu poi sy zgana ne'i lo simlu be tu'a pa mokka .i sy na kakne lo nu xamgu viska .i ku'i krici lo nu zgana la'e di'e

ni'o pu lo nu le toljundi remna cu se daspo to rinka lo cnino ke ciblu bumru toi vau ny celgunta le crida fo lo barda ke xance xumjimcelxa'i lo cizra gusni dacti .i sy pu na djuno lo du'u lo xumjimcelxa'i poi barda simsa ti gi'e srana lo pa xance po'o cu zasti .i ku'i .ue ny ca'a pilno re xance .i lo nu celgunta cu rinka lo mutce cladu .e lo barda ke fagri gusni be ze'o lo jipno .i le crida cu pa re'u bacru .i bacru lo cmoni krixia poi simsa lo se xrani cinfo .i ca zi bo le crida cu sutra klama ny .i sy na'e sai jimpe lo tadji be lo nu lo oxtapodi simsa cu mutce sutra pa'a la'e di'u ne'i nai lo djacu .i ku'i .ii li'a sai le crida cu kakne .i ku'i .u'e le nanmu cu zmadu fi lo ka sutra .i sy no roi pu viska lo remna poi milxe jibni ny lo ka sutra

ni'o ta'o lo ve xumjimcelxa'i ca'o gusni ne'i lo grusi recta be le crida ca lo nu re tu'urbirka cu jibni binxo .i ta'o nai ny cu jgari re barda je kusru dakfu .i ny galtu clani plipe gi'e xa roi katna le crida ca lo nu .u'e sai sy ca'o pa roi ne'i mo'i vasxu .i le crida cu cladu zmadu krixia gi'e troci je snada lo nu jgari pa birka be ny to le birka poi te jgari lo dakfu toi .i .ui ny jgari ze'o lo barda kosta lo sinxa fagri grana gi'e renro ri le moklu be le crida .i ny ca lo nu lo ka cortu cu mukti lo nu na birka jgari cu jgari le moklu .i ki'u bo fanta lo nu le crida cu ze'o sputu lo fagri .i le crida cu tcetce slilu je desku .i lo la'a ciblu be le crida be'o poi grusi cu flecu lo loldi .i le crida cu jgari ny se ri'a no da

ni'o ba za bo le crida cu co'u desku .i ji'a za'u roi manku .i sy tirna lo nu katna .e lo blaci botpi sance .i ku'i na djuno lo rinka .i sy mutce terpa desku .i ba zi bo le nanmu cu jibni klama gi'e friti lo xance .i ku'i lo ni terpa cu fanta lo nu pilno .i se ki'u bo ny dunda lo cmalu botpi gi'e cusku lo glico panra be lu pe'u do ko pinxe ti .i ri rinka lo nu do surla ca'o lo cacra be li so'o .i ji'a ko na terpa lo mukti be mi .i do pu zi viska da poi banzu lo nu do djuno lo du'u mi na nitcu lo xukmi lo nu da'i xairgau do li'u

ni'o ti'a ny boi sy viska lo nu le crida cu litki binxo kei gi'e rigni desku .i sy masno cpacu le botpi se pi'o pa desku xance gi'e pinxe .i ny zo'e mo'i lo daski cu punji lo cmalu jadni le xadni .i ny cusku lo glico panra be lu mi pu viska lo nu do troci co sidju lo zdani claxu .i mutce virnu li'u .i sy na cinmo lo ka virnu .i ku'i cinmo mo'a da bai le se pinxe .i ca lo nu ny za'u re'u friti pa xance vau sy jgari

ni'o ba zi bo la susan .e le nanmu cu sanli vi le cfari be le cmalu dargu .i ny friti lo judri karda gi'e cusku lo glico panra be lu ko lebna ti .i do ba djica lo nu tavla da .i ku'i no drata be mi'a ba krici do .i lo nu do troci lo nu fadni zunkte ca lo nu do pu'o za'u roi tavla mi cu mutce vajni mi'a .i mi'a troci .a'i sai lo nu badgau lo remna tu'a lo se terpa se djuno li'u

ni'o sy cpacu lo karda poi se prina lo glico panra be lu la .deivid.uit. poi cmima la nicate cadzu li'u .e lo fonxa judri po'o .i sy catlu le kanla be la deivid gi'e .a'u cu'i peisku lo glico panra be lu lo ti kanla zo'u vi'a xekri .i mulno se cau lo blabi .i ma rinka li'u .i ku'i sy tavla cusku lo glico panra be lu ki'e do li'u po'o gi'e carna le gusta po lo nu penmi le mensi

ni'o pa pi ci mo'o nu jdice

.i sy ca'a tolcliva le gusta ca lo nu le mensi be sy no'u la keit cu denpa .i ky se fanza .i ku'i ky ba zi tolmorji lo nu fanza vau mu'i lo nu casnu gi'e skicu lo se morji .i sy nelci lo nu penmi ky .i ku'i ca'o cinmo so'u da .i cizra cinmo .i ku'i sy na kakne lo nu mutce terpa la'e de'u .i sy jo'u ky casnu ze'a lo cacra be li ji'i re .i ba bo ky nitcu lo nu cliva vau ki'u lo nu gunka ca lo bavlamdei .i sy lifri lo nu casnu vau pa'a lo senva .i sy prami jgari ky gi'e suksa lifri lo nu bartu le gusta gi'e kansa no da gi'e se sruri lo manku nicate .i ca lo nu sy xruti lo zdani vau sy mutce gleki tu'a lo xukmi poi bandu fi lo nu terpa

ni'o la susan cikna binxo ca lo nu terpa krixia .i va'o lo senva le crida cu ro roi vi jersi sy .i le moklu be sy cu sudga .i sy cortu le stedu .i sy kucli tu'a lo xalka bilma ba'o lo nu morji lo xukmi .i sy sanli mu'i lo nu cpacu lo djacu

ni'o sy mutce djica lo nu to'e krici le nu crida gunta .i ku'i na kakne .i sy frili morji lo tcila be le nu gunta be'o gi'e pe'isku lo glico panra be lu lo nu mi se xanri ro purlamcte lifri cu nibli lo nu mi mulno lo ka fenki .i se ri'a bo mi bai krici no da .i ku'i la'e di'u cu na se plika'e .i se ki'u bo mi na'e pensi le cumki li'u .i sy sisku le karda be la deivid .i bazibo facki .i ku'i na pilno .i sy djica lo nu jimpe lo se pensi je se djica ba'o lo nu pilno .i ku'i na ca jimpe

ni'o sy fonta'a lo jibri prenu lo nu na'e gunka ca le cabdei mu'i lo nu bilma .i sy na nitcu lo nu tcica galfi lo voksa .i ki'u bo sy ca'a bilma simlu .i lo jibri prenu cu curmi .i sy troci lo nu za'u roi sipna .i milxe snada .i ba bo sy milxe zenba lo ka xamgu cinmo .i sy pensi lo nu ca'a gunka .i ku'i pe'i na xamgu sidbo .i se ki'u bo sy zbasu lo tcati gi'e ji'a zutse vi lo canko te zu'e lo nu pensi

ni'o pa mai sy kucli lo du'u ma kau jei fadni fa lo nu le crida cu gunta lo remna .i sy pensi la'e di'e .i za'a no da to'e se fadni le nu cadzu .i .ua na drani .i le ka mulno manku cu pu na'e se fadni .i ku'i la'a na ku lo crida cu tolcanci ne'i ro manku ke cmalu dargu .i va'o la'e di'u no zunkte cu kakne lo nu fanta lo nu ro remna cu djuno tu'a lo crida .i se ni'i bo lo drata cu rinka lo nu lo crida cu tolcanci .i la'a cu'i cunso .i ji'a li'a na rirci .i ni'i bo la deivid simlu lo ka na terpa jo spaji .i da'i lo nu lo crida cu gunta pa roi lo nanca be li pa no no bai lo mutce purci ke dimna selsku to ri .a lo simsa toi cu mukti lo nu mutce xanka .i ku'i pe'i la deivid cu so'i sai roi damba lo crida

ni'o la susan cu denpa lo nu zbasu lo cmalu sanmi gi'e di'a pensi la'e di'e ca'o lo nu citka .i sy ca kucli la deivid .i li'a sai lo cizra to ri ji'a milxe fenki toi remna po'o di'i damba lo crida .i ma mukti .i dy pu badgau sy .i ku'i za'a dy na'e mutce kurji sy .i li'a dy pu bandu so'i remna .i le se tarti be dy cu simsa lo jursa mikce lo ka sidju ro de gi'e ku'i na cinmo kurji .i sy pe'isku lo glico panra xe lu li'a lo nu damba lo crida cu jibri la deivid to'i cmalu nu denpa toi .i .ii dai sai .u'e sai mutce cizra gi'e se terpa li'u

ni'o ku'i ji'a la .susan. pe'isku pa'a lu .i ku'i ji'a mutce vajni je banli .i lo remna poi bandu ro drata remna lo crida cu traji lo ka vrude je vajni .i ba'e mi no roi gasnu da poi vajni li'u .i ta'o la susan cu barja ke xalka selfu .i sy di'i sidju lo se selfu .i ku'i na krici lo du'u la'e di'u cu vajni .i sy glico pe'isku pa'a lu .oi mi bilga lo nu pensi lo fenki sidbo be lo xalka bilma se selfu .i la'a so'o ra cu jetnu li'u

ni'o la susan cu sukca sanli gi'e cadzu fa'a lo fonxa .i ca'o bo glico pe'isku pa'a lu .o'o cu'i lo nu mi zunkte jdice cu mukti lo nu mi ca zunkte li'u .i sy pilno lo judri .i ba zi bo lo na'e slabu voksa jai lojbo bacru lu coi ma do tavla lo krati be la nicta cadzu .i mi sidju do ma li'u

ni'o pa pi vo mo'o nu casnu

.i la susan cu mulno lo ka na jimpe .i se ki'u bo cusku lo glico panra be lu .y. ki'a sai li'u .i le se voksa cu cusku lo glico panra be lu .ue .u'u na drani bangu li'u be'o ce'o lo glico panra be le pu zi jufra .i sy spuda fi lo panra be lu ki'e do .i mi sisku tu'a la deivid uit li'u .i cmalu denpa .i py cusku pa'a lu la deivid cu nicta gunka .i se ki'u bo ca sipna to'i ji'a cmalu denpa toi .i xu do nitcu lo nu ciksi casnu li'u .i sy cusku pa'a lu go'i li'u ju'e lu je'e .i do djica lo nu ba tavla la deivid gi'i ca tavla lo drata li'u ju'e lu mi denpa tu'a la deivid li'u ju'e lu je'e .i .e'u ko vitke ti'u lo ji'i re no moi cacra li'u .i py dunda lo judri be lo gusta .i ba zi bo mo'u casnu

ni'o la susan cu pensi ca'o le djedi .i ba bo sy klama lo gusta .i sy ze'i fakci fi la deivid .i la'e di'u cu frili ri'a lo nu dy po'o dasni lo manku lenjo .i sy zutse vi dy gi'e cusku lo glico panra be lu .oi xu lo nu mipri cu sarcu .i mi ca djuno lo jibri be do .i ji'a ma mukti lo nu pilno lo manku lenjo .i la'e di'u na banzu lo nu mipri le flira be do li'u .i dy milxe se fanza gi'e cusku pa'a lu pa mai do ba'e na djuno le jibri be mi .i la'a cu'i do smadi po'o .i re mai le manku lenjo cu bandu ge nai le flira be mi gi ro kanla be mi lo nu xrani .i ci mai lo nu mipri cu bandu lo pendo be mi li'u

ni'o le re mei denpa .i da selfu re ra lo nu ciska lo se djica cidja .i ba zi bo sy cusku pa'a lu .u'u sai mi di'i cusku pu lo nu mi pensi ze'a lo banzu li'u .i dy cusku lu ki'e .y. ma li'u ju'e lu mi'e susan li'u ju'e lu coi susan .i .e'u lo nu do skicu ro se krici be do bei mi cu xamgu cfari li'u ju'e lu vi'o .i do'o se jibri lo nu bandu fi lo crida .i lo nu do damba cu di'i sarcu to'i cmalu denpa .i sy barda vasxu toi .i ji'a .au sai mi kansa do lo nu bandu li'u .i mu'i la'e di'u lo flira be dy cu milxe fengu binxo .i dy cusku pa'a lu do be'a na djica li'u .i mu'i la'e di'u sy zmadu fengu binxo gi'e cladu cusku pa'a lu do ba'e na zifre lo nu skicu ma kau poi mi djica .i .o'o nai sai do pu zi fengu mi lo nu mi pu skicu lo krici be do .i ku'i do ca mintu gasnu li'u

ni'o dy se fanza bacru gi'e cusku pa'a lu mi xenru .i ku'i do na jimpe ro pagbu be le se cpedu be do .i ma mukti le nu cpedu li'u ju'e lu mi no roi gasnu da poi mutce vajni .i ju'o do se jibri lo mutce vajni li'u ju'e lu go'i .i ji'a mutce ckape gi'e se sarcu lo nu cirko so'i da .i xu le zdani claxu remna poi pu morsi binxo ca srana le se cpedu li'u ju'e lu milxe srana .i da'i lo nu mi na djica lo nu bandu lo simsa remna

cu mukti lo nu mi na cpedu .i cirko ma mu'a li'u ju'e lu mu'a mi na kakne lo nu cadzu ca lo donri se cau lo jinme jorne lenjo noi mutce manku gi'e to'e melbi gi'e kajde ro da lo nu mi mutce cizra li'u

ni'o sy cmila .i dy cusku pa'a lu ma zdile li'u ju'e lu mi bajra ke xalka selfu .i sa'e nai mi na morji lo detri be lo nu mi me'i re'u viska lo solri li'u ju'e lu .ua .u'i li'a do na mutce terpa lo nu cikna ca'o lo nicta po'o li'u .i dy ze'u smaji zgana sy .i la'e di'u faurtei lo temci poi zmadu lo banzu be lo nu sy mutce xanka binxo .i ji'a sy ganse lo mutce cizra .i simsa lo nu sy pencu lo lenku .e ba bo lo glare .e ba bo lo pecycpina lo ve'e skapi .i sy co'a krici lo du'u dy catlu lo ruxse'i be sy

ni'o dy ze'i de'a viska lo kanla be sy .i ca bo sy kakne lo nu zenba lo ka surla .i ba bo dy di'a viska sy gi'e cusku pa'a lu .i'a sai mi curmi lo nu do troci co binxo lo cmima be la nicta cadzu .i .e'u nai sai lo pruce cu clani je nandu .i ji'a pu lo nu ca'a co'a cilre tu'a mi'a vau do bilga lo nu cilre fi la lojban li'u .i la susan poi pu zi co'a gleki simsa cu cusku pa'a lu la lojban mo li'u ju'e lu bangu .i xu do pu'i pilno la internet to'i sy tugni desku lo stedu toi .i xamgu .i ko sisku la lojban se pi'o .i bu li'u ju'e lu .ua nai ma mukti li'u ju'e lu .u'i nai lo crida na kakne lo nu jimpe ja cusku bau la lojban li'u ju'e lu mi ba troci .i to'i cmalu denpa toi .i .y. lo crida cu kakne lo nu tavla xu li'u ju'e lu .u'i lo crida poi do pu viska cu na go'i .i ri cilce ganlu simsa .i se ki'u bo na mutce pensi .i ku'i so'i klesi be lo crida cu zasti .i ji'a so'o ri cu tcetce mencre li'u

ni'o la deivid cusku pa'a lu ta'o nai do zifre lo nu tavla lo drata ke lojbo prenu .i ku'i .e'u nai lo nu da'i do cusku tu'a la nicta cadzu ra cu krinu lo nu da'i do ba no roi tavla la nicta cadzu .i xu do jimpe li'u ju'e lu go'i li'u ju'e lu xamgu .i ji'a do nitcu lo nu jimpe di'e .i la nicta cadzu cu nitcu tu'a so'i jibri .i lo nu crida kalte cu pa fi'u so'i mei pagbu po'o .i ku'i .e'u nai sai lo nu do crida kalte binxo cu rinka lo nu do joi pa crida ba se fatri lo ruxse'i be do .e lo menli be do .i la nicta cadzu cu ro roi se sidju lo crida poi jamna lo crida poi simsa le crida poi troci lo nu catra do .i lo nu crida kalte cu na frili li'u

ni'o la susan simlu lo ka terpa .i ku'i cusku pa'a lu mi kakne lo nu troci po'o li'u .i za'a la deivid gleki la'e di'u .i ca zi bo lo cidja cu tolcliva .i sy jo'u dy citka gi'e casnu lo na mutce vajni .i sy co'a nelci dy ca'o lo nu sanmi .i sy kucli lo nu pendo binxo .a'o

ni'o pa pi mu mo'o nu cilre

ni'o pa pi mu mo'o nu cilre

.i dei skicu lo skami seltecana nu casnu ve cu'u la'o zoi #lojban zoi po la irk .i la'a cizra simsa .i la susan pilno la irk di'i so'a djedi .i ku'i jarco lo cinri casnu po'o .i ji'a vimcu so'o selsku le dei vreji mu'i lo nu na cinri gi'a na srana

<susan> coi

<taliesin> coi susan do mo

<susan> yyy troci lo cilre lojban i y tavla lojban po'o pe'u

<taliesin> mi djisku lu troci lo nu cilre la lojban li'u

<susan> ki'e do

<taliesin> xu do djica lo nu mi cusku fi do bau la lojban po'o

<susan> y denba

<susan> tugni

<taliesin> .u'i ru'e stidi zo go'e poi simsa zo go'i

<susan> ki'e .i yyy mi pensi jimpe

<taliesin> stidi lu pe'i mi jimpe li'u

<susan> oi nandu

<broca> coi ro do

<taliesin> coi broca do mo

<broca> mi pu zi tcidu lo cukta poi skicu lo gerna be la gliban .i mutce cinri .i ku'i nandu

<susan> .ii .oi ro'e sai

<broca> coi susan .i do terpa ma

<taliesin> la susan pu spuda lo nu mi'o cusku fi sy bau la lojban po'o .i ku'i cnino cilre

<broca> .ua .io sai doi susan xu do terpa lo mi barda jufra

<susan> .oi mi na jimpe .i mi cortu lo stedu .i co'o

<taliesin> co'o

<broca> co'o
 ni'o balvi lo jeftu be li ji'i pa
 <susan> coi ro do
 <susan> xu do tirna
 <susan> coi norsmu
 <norsmu> la pu makfa da'i
 <norsmu> re'i la susan
 <susan> y makfa ki'a
 #lojban> ny: mo'a milxe cadzu
 <susan> yyy ki'a sai
 <norsmu> coi mi
 <susan> y ma mukti cu do rinsa do
 <susan> la norsmu xu do tirna mi
 <norsmu> mi bredi
 <susan> .ua nai du bredi ma
 <norsmu> doi co'e
 <broca> coi susan .i xu do djuno lo du'u la norsmu cu zmiku gi'e nai remna
 <susan> .oi sai .i mi na djuno .i mi ca tatpi .i co'o ro do
 ni'o balvi lo jeftu be li ji'i ci
 <susan> coi ro do
 <broca> coi susan do mo
 <taliesin> coi susan
 <susan> mi sai tatpi .i mi pu clani gunka
 <taliesin> .e'u mi mutce tatpi
 <broca> zo sai cu se lidne lo valsi poi ra srana .i ji'a ko pilno lo re moi te bridi be zo tatpi
 <xod> coi ro do
 <broca> coi xod do mo
 <xod> mi xebni la buc
 <broca> xu lo cnino mukti cu zasti
 <susan> je'e .i xu lu mi tatpi sai lo nu mi clani gunka li'u
 <xod> go'i .i la buc pu zi sfa lo to'e gunka poi pante la ual mart
 <xod> doi sy mi stidi zo ze'u .o nai zo za'o .e nai bo zo clani
 <susan> ki'e xod .i xu lu mi mutce tatpi lo nu za'o gunka li'u cu drani
 <xod> go'i
 <susan> la buc ki'a
 <xod> la buc cu nolraitru lo merko gugde
 <susan> y lo merko gugde na nolraitru ponse mi pe'i
 <xod> zo mi na sarcu .i zo pe'i ro roi srana do
 <xod> la buc na je'u nolraitru .i ku'i tarti simsa lo nolraitru
 <susan> .u'i
 <taliesin> doi susan lo nu ciksi la lojban do bau la lojban cu nandu .i ma mukti lo nu do djica le
 go'i
 <susan> .oi sai le mi stedu cu cortu
 <susan> mutce pluja
 <taliesin> .u'i sai mi pu xusra
 <susan> y .ua mi jimpe .u'i
 <susan> mi djica lo nu sutra cilre la lojban
 <taliesin> ma mukti
 <susan> mi djuno lo prenu nelci la lojban
 <taliesin> mi stidi zo poi .i lu la lojban li'u cu pu srana lo ci moi se bridi be zo djuno .i li'a sai do
 na djica
 <taliesin> ma cmene le prenu
 <susan> .oi mi sipna nitcu .i co'o

ni'o balvi lo masti be li ji'i pa
 <susan> coi ro do .i do mo
 <dir> coi susan
 <norsmu> fenki mo
 <susan> .oi mi na nelci la norsmu
 <dir> ma krinu
 <norsmu> ba ca'o brode
 <susan> ri pu cfipu mi .i xu do nelci la norsmu
 <dir> .u'i go'i
 <norsmu> mi .i xu melbi
 <susan> ma mukti
 <dir> mi finti la norsmu
 <susan> .u'u mi y xenru lo nu mi mabla
 <dir> na nabmi .i la norsmu cu ja'a cfipu .i ny na troci lo nu cusku lo se kakne se jimpe
 <norpan> .i ku'i lo nu troci co jimpe ny cu la'a mutce sidju lo nu cilre
 <susan> .ue coi norpan do pu no roi tavla
 <susan> doi norpan xu do tirna
 <taliesin> ko pilno zo jundi .e nai zo tirna
 <susan> coi tal .i ma krinu
 <taliesin> xu do tirna lo selsku be la irk se pi'o lo kerlo be do
 <susan> na go'i
 <taliesin> la'e di'u krinu
 <susan> je'e mi jimpe
 <taliesin> .u'i xu do di'i nitcu lo nu ciksi fi do fe lo nu do jimpe
 <susan> y ki'a
 <taliesin> zo je'e lidne lo cmene be lo te cusku poi do djica lo nu djuno lo du'u do jimpe .i do pu
 cusku lu je'e mi li'u
 <susan> yyy mi krici jimpe .i ku'i le stedu be mi ca cortu .i co'o ro do
 <taliesin> co'o susan
 ni'o balvi lo masti be li ji'i re
 <susan> coi ro do
 <susan> do mo
 <broca> coi susan mi tadni
 <susan> do tadni ma
 <broca> lo citri .i mi cuxna lo citri xe ctuca poi ne sarcu
 <susan> .a'u ru'e citri ma
 <broca> lo mutce purci misro .i mi bilga lo nu tadni so'o xe ctuca poi na srana lo ralju se tadni be
 mi .i ji'a mi ro roi cinri lo pu zu misro
 <susan> je'e .i do ralju tadni ma
 <broca> lo bangu saske
 <susan> .u'i .i se ni'i bo mi na jimpe lo du'u ma kau mukti lo nu do tadni la lojban .i je'u nai zo'o
 <broca> .u'i mi tadni la lojban te zu'e lo nu fanza lo ctuca be mi
 <susan> .u'i sai mi ji'a stidi lo nu do di'i xusra lo si'o tu'a la sapir.uorf cu prane
 <broca> .u'i
 <susan> .i ji'a sai ki'u lo nu da'i la'e di'u na banzu cu stidi fa mi di'e .i do xusra lo nu do finti lo
 samselpla poi prane jimpe la gliban gi'e djica lo nu sy gubni binxo se pi'o la .ueb. gi'e ku'i do pu'o nelci
 lo tarmi be lo te pruce
 <broca> .u'i sai
 <taliesin> .u'i sai
 ta'o la'e lu tarci bu li'u cu sinxa lo sinvi selsku ve cu'u la .irk.
 <taliesin> doi susan do certu la lojban
 <susan> ki'e sai tal .i mi mutce gunka
 broca .i ji'a do bredi

susan yy mi bredi ma
broca da poi rinka lo nu do cilre la lojban .i .a'o xamgu funca
susan y ki'e .i co'o broca
broca xamgu lo nu do na spuda .i co'o susan

ni'o pa pi xa mo'o nu cfari

.i la susan ba zi lo ro moi skami nu casnu poi pu zi jarco cu pilno lo fonxa judri be la nictē cadzu .i ko'a spuda lo fonxa lu coi ma do tavla lo krati be la nictē cadzu .i mi sidju do ma li'u .i sy cusku lu .u'u ko zi denpa .i mi so'u roi pu bacru tavla la lojban .i yyy la susan lo nu vitke do'o li'u ju'e lu .ua coi susan .ui sai mi pu cilre so'i xamgu do .i sa'e do sutra cilre fi la lojban li'u ju'e lu y ga'i nai .u'u ku'i mi ca'o masno li'u ju'e lu ju'o do ba zi sutra tavla .i xu lo bavlamdvedi cu xamgu do li'u ju'e lu mutce xamgu li'u

ni'o ji'a ko'a cusku lu xu do jimpe lo du'u lo nu do vitke mi'a cu cumki rinka lo nu do mrobi'o li'u ju'e lu y mrobi'o ki'a li'u ju'e lu morsi binxo li'u ju'e lu mi jimpe li'u ju'e lu .i ji'a lo nu do xrani mi'o cu ju'o rinka lo nu do mrobi'o li'u ju'e lu mi jimpe li'u ju'e lu xamgu li'u

ni'o ko'a dunda lo judri .e lo tcika sy gi'e nu casnu kei sisti .i la susan djuno lo du'u lo cnino pagbu be lo za'i jmive cu ca cfari .i sy gleki gi'e ji'a tcetce xanka